



Per Bruvold frå Bergen opna skisesongen ved Fjellandsbøvatnet. (Foto: Ola Matti Mathisen)

Det har kome ein halvmeter snø øverst i dalen og der vart det notert 15 minusgrader julenatta og 13 i ettermiddag. Nede ved fjorden har det stoppa på 6 grader i dag. Førabels må difor konklusjonen bli at det er ei skikkeleg, ekte jul på gang også på våre kantar - vermessig sett!

Men dei som har håpa på ein skeisetur på Fjellandsbøvatnet har vorte skuffa på grunn av det store snøfallet på den opprinneleg så fine isen. No er snømengda truleg for stor til at det er overkommeleg å setta igang brøyting.

Difor blir ein utveg å spennja på seg skiene i staden, og det hadde fleire gjort i ettermiddag. Skiføret var fint sjølv om det var litt i kaldaste laget. Det konstaterte mellom andre Per Bruvold frå Bergen, som nyt naturen vår etter å ha kjøpt fritidshus på Ytre Eik i Uskedalen for stutt tid sidan.

Andre satsa på ein rusletur innover den svært godt brøyta vegen. Det gjorde familiane Mathiesen, Naasen Karlsberg og Hellesnes.

Atter andre hadde plukka fram trugene - slett inga dårleg løysing under dei noverande føretilhøva.

Også på jordene nede i bygda var det skiaktivitet å sjå allereie tidleg i dag - tildels i nybrøyta løyper.

Held det fram slik kan vi sjå imot ein skivinter av fjorårskaliber!

Av Ola Matti Mathisen



Familiane Mathiesen, Naasen Karlsberg og Hellesnes satsa på ein rusletur. (Foto: Ola Matti Mathisen)